

Das 28. Capitel.

Welche Stern ob oder vnder der Erden
zu jederzeit des Tags oder
Nachts stehen.

Wiltu wissen/ welche Stern ober/ oder wel-
che vnder dem Erdboden seind/ so kanstu solches also
erkennen.

Nimb für dich des Quadranten rucken / vnnnd such inn
demselbigen die gegebne stund des Tags oder Nachts: leg als-
bald darauff den Zeiger Index, vnd stelle vnder denselben dei-
nen Tag: wann du nun dir einbildest ein Lini/ so von 6. zu 6.
durch des rucken Centrum geht/ vnd mir alhie soll Horizont
genannt werden/ so seind die Stern/ so oberhalb derselben Li-
nien gegen dem Wort Meridies stehn. ob dem Erdboden oder
Horizonte: die andern aber vnder demselben.

Als am Christag alten Calenders / Nachts vmb 9. vhr
wolt ich gern wissen/ was für Stern oberhalb der Erden stün-
den/ suche demnach im rucken des Quadranten in dem eusser-
sten Limbo die 9. stund / so da steht zwischen occidens vnnnd
Septentrio, leg darauff den Zeiger / vnnnd vnder den Zeiger
ruck ich den 25. Decemb. oder 14. grad des Steinbocks / vnd
lasse die scheiben also vnbeweglich stehn/ sihe vnd befinde dem-
nach / daß oberhalb der Horizont Lini (welche von 6. zu 6.
vhr/ mit dem Sinn/ faden/ Lineal oder dergleichen / soll ge-
zogen werden) stehn nachfolgende Stern: 13. Cor Leonis.
12. Lucida hydrę. 11. 10. 9. 8. 7. 6. 5. 4. 2. 1. 27. 26. deren Na-
men oben im 2. cap. zusuchen. Das